

皇

清

經

解

皇

清

經

解

皇清經解卷四百九十六

學海堂

弁服釋例

興化任侍御大椿著

爵弁服下

爵弁以三十升布爲之赤色而微黑上古以布中古以絲廣八寸長尺六寸或曰高八寸長尺二寸

七月載元載黃疏緇今禮記作爵言如爵弁色也

司服凡弔事弁經服疏爵弁之形以木爲體廣八寸長尺六寸以三十升布染爲爵頭色赤多黑少

鍾氏五入爲緇注染纁者三人而成又再染以黑則爲緇緇今禮俗文作爵言如爵頭色也又復再染以黑乃成緇矣鄭司農云以論語曰君子不以紺緇飾又曰緇衣羔裘爾雅曰

一染謂之緇再染謂之頰三染謂之纁詩云緇衣之宜兮元謂此同色耳染布帛者染人掌之凡元色者在緇纁之間其六入者與

士冠禮爵弁服注爵弁者冕之次其色赤而微黑如爵頭然或謂之緇其布三十升疏云爵弁者冕之次者凡冕以木爲體長尺六寸廣八寸績麻三十升布上以元下以纁前後有旒其爵弁制大同惟無旒又爲爵色爲異又曰其色赤而微黑如爵頭然或謂之緇者七入爲纁若以纁入黑則爲紺以紺入黑則爲緇是三人赤再入黑故云赤而微黑也云如爵頭然者以目驗爵頭亦多黑少故以爵頭爲喻也以紺再入黑汁與爵同故取鍾氏緇色解之故鄭注鍾氏云緇今禮俗

文作爵言如爵頭色也鄭此言赤者對文爲赤若將緇比纁則又黑多矣故淮南子云以涅染紕則黑於涅況更一入黑爲緇乎故巾車云雀飾鄭云雀黑多赤少之色是也云其布三十升者取冠倍之義是以喪服衰三升冠六升朝服十五升故冕三十升也

記周弁殷髀夏收疏案漢禮器制度弁冕周禮弁冕相參攷之冕以木爲體廣八寸長尺六寸績麻三十升布爲之上以元下以纁前後有旒尊卑各有差等

喪服記朋友麻注弁經者如爵弁而素疏言爵弁者制如冕以木爲中幹廣八寸長尺六寸前低一寸二分以三十升布上元下纁爵弁之體廣長亦然亦以三十升布但染作爵頭

色赤多黑少之色置之於版上

王制制三公一命卷疏爵弁者如雀頭色

案後漢志注引蔡邕獨斷曰殷黑而微白前大而後小夏  
純黑而赤前小而後大皆以三十六升漆布爲之詩云常  
服黼黻書曰王與大夫盡弁上古皆以布中古以絲孔子  
曰麻冕禮也今也純儉則是布用三十六升與鄭注異攷  
八十縷曰升三十升則二千四百縷也古布濶二尺二寸  
當今尺三寸有奇若容三十升二千四百縷則今尺一分  
之地幾容十八縷已恐過密難成若後漢志注所引獨斷  
云以三十六升漆布爲之則一分之地幾容二十一縷有  
奇更爲細密難成矣今攷獨斷本文但云三十升布不云

三十六升則後漢書注中六字當爲衍文又攷班固食貨志布廣二尺二寸後魏書舊制人閒所織絹布等皆幅廣二尺二寸長四十尺爲一端與鄭此注同淮南子天文訓黃鍾之律修九寸物以三生三九二十七故幅廣二尺七寸注古者幅比皆然也據此則幅又不止二尺二寸矣淮南子高誘皆漢人其說似亦有據古冕弁用布每幅容麻三十升或幅廣之度不盡如班志及鄭注所云乎

又案左氏桓二年傳袞冕黻珽疏引阮譔三禮圖漢禮器制度云冕制皆長尺六寸廣八寸天子以下皆同沈引董巴輿服志云廣七寸長尺二寸應劭漢官儀云廣七寸長八寸沈又云廣八寸長尺六寸者天子之冕廣七寸長尺

二寸者諸侯之冕廣七寸長八寸者大夫之冕司服疏謂爵弁之形以木爲體廣八寸長尺六寸士冠禮疏以冕制參攷弁制謂皆廣八寸長尺六寸三禮圖所載舊圖亦同則與漢禮器制度冕制合又後漢志及獨斷晉志均云爵弁高八寸長尺二寸初學記引董巴輿服志爵弁廣八寸長尺二寸則爵弁大小尺寸傳述又異豈廣八寸長尺六寸者爲天子爵弁廣八寸長尺二寸者爲諸侯以下爵弁亦如沈氏所云諸侯天子之冕大小各異乎但左氏桓二年傳疏引董巴輿服志謂冕廣七寸長尺二寸初學記引董巴輿服志爵弁廣八寸長尺二寸則是爵弁反廣於冕一寸似與冕弁大小之制未合也

又案士冠禮爵弁皮弁緇布冠各一匱注爵弁者制如冕  
黑色與前爵弁服注赤而微黑似小有異攷染法三入以  
前全以丹秫染赤至四入染黑乃爲紺紺更染黑乃爲緇  
是赤已三入黑方再入赤深黑淺爲青廣雅云碧縹紺緇  
緇緇總蒼青也青亦爲黑記曰或素或青夏造殷因則以  
青爲黑也蓋緇爲淺黑故緇爲青黑亦爲青爵緇同色此  
色以赤爲體則曰赤而微黑以黑變赤則曰黑色鄭士冠  
禮前後二注互相成也又攷說文纁字下云帛雀頭色一  
曰微黑色如紺纁淺也蓋四入爲紺五入爲緇緇雖黑深  
於紺尙與紺相近故說文云如紺而比之六入之元七入  
之緇則淺矣師古文帝紀注纁少也淺與少同玩纁字之

義可以知爵色矣

又案獨斷曰冕弁上古以布中古以絲則鄭注士冠禮所云三十升布據上古也孔子曰今也純儉據中古也後漢志及晉志釋爵弁皆云繪其上則不以布矣皆法中古也又案後漢志載爵弁之制云有收持筭所謂夏收殷畀者也攷玉海引三禮圖周弁殷畀夏收之制云三冠下皆有收注云如笠下收則收之一物在弁之下又以持筭則兩旁皆有之豈亦如皮弁之邸有周緣之象如魏臺訪議所云乎又後漢志載幘制云崇其巾爲屋合後施收又云尙書幘收方三寸則收之廣長皆三寸其形方正攷隋志烏紗帽卽幘之遺制今所傳烏紗帽別以漆纚方二三寸施

帽後其卽合後施收歟以幘之收求弁之收未知合否古制旣湮終不可以臆測也

天子玉笄朱組紃諸侯玉笄青組紃大夫士象笄皆緇組紃纁

邊

韋弁皮弁笄同

葛覃傳公侯夫人紃紼疏紃者纓之無綏從下而上者也祭義曰天子冕而朱紃諸侯冕而青紃此諸侯當以青爲組在冕下仰屬之故士冠禮注云有笄者屈組爲紃垂爲飾無笄者纓而結其條是也

弁師玉笄朱紃注朱紃以朱組爲紃也紃一條屬兩端於武疏謂以一條繩先屬一頭於左旁笄上以一頭繞於頤下至向上於右相笄上繞之是以鄭注士冠禮云有笄者屬組以

爲紃垂爲飾無笄者纓而結其條彼有笄據皮弁爵弁此五  
冕皆有笄與彼同此言屬於武者據笄貫武故以武言之其  
實在笄

士冠禮皮弁笄爵弁笄緇組紃纁邊注笄今之簪有笄者屈  
組爲紃垂爲飾無笄者纓而結其條纁邊組側赤也疏案周  
禮弁師云掌五冕而云玉笄朱紃則天子以玉爲笄以朱爲  
紃又案祭義云天子冕而朱紃諸侯冕而青紃諸侯之笄亦  
當用玉矣又案弁師韋弁與皮弁同科皮弁有笄則二者亦  
有笄矣又云其大夫紃案禮器云管仲鏤簋朱紃鄭注云大  
夫士當緇組紃纁邊是也其笄亦當用象耳

喪服傳吉笄者象笄也疏傳明吉時之笄以象骨爲之據大

夫士而言案弁師天子諸侯筭皆玉也

雜記管仲鏤簋而朱紘注冠有筭者爲紘紘在纓處兩端上屬下不結

左氏桓二年傳衡紘紘注紘纓從下而上者疏紘纓皆以組爲之所以結冠於人首也纓用兩組屬之於兩旁結之於頤下垂其餘也紘用一組從下屈而上屬之於兩旁垂其餘也紘纓同類以之相形故云紘纓從下而上者弁師掌王之五冕皆玉筭朱紘祭義稱諸侯冕而青紘士冠禮稱緇布冠青組纓皮弁筭爵弁筭緇組纓鄭元云有筭者屈組爲紘垂爲飾無筭者纓而結其條以其有筭者用紘力少故從下而上屬之無筭者用纓力多故從上而下結之冕弁皆有筭故

用紃緇布冠無笄故用纓也魯語稱公侯夫人織紃縹知紃亦織而爲之士冠禮言組纓組紃知天子諸侯之紃亦用組也

案禮器管仲鏤簋朱紃謂管仲冕用朱紃同於天子之冕故注云天子之冕朱紃管仲大夫也大夫之冕經文未著何紃彼注謂大夫士當緇組紃纁邊疏引士冠禮爵弁之紃爲證雜記疏亦謂大夫之冕緇組紃亦據士冠禮爵弁之紃也卽知大夫之冕與爵弁之紃同至於天子諸侯爵弁經文亦未著何紃士冠禮疏引祭義天子冕而朱紃諸侯冕而青紃以證天子諸侯爵弁之紃則知天子諸侯大夫冕弁之紃皆同也

又案弁師王之皮弁玉笄則爵弁笄亦以玉明矣諸侯爵  
弁笄用玉雖無明文弁師諸侯冕用玉笄爵弁爲冕之次  
其用玉笄當亦如冕故士冠禮疏云諸侯之笄當用玉喪  
服吉笄尺二寸注亦云天子諸侯之后夫人用玉爲笄夫  
人玉笄則諸侯亦玉笄審矣三禮圖梁正阮氏圖云士以  
骨大夫以象士冠禮疏謂大夫士均用象攷儀禮喪服記  
子折笄首傳曰吉笄者象笄也疏傳明吉時之笄以象骨  
爲之據大夫士而言然則士之吉笄亦得以象也

又案弁師皆元冕朱裏延紐注紐小鼻在武上笄所貫也  
今時冠卷當簪者廣袤以冠縫其舊象歟此言冕制也弁  
亦有笄則與冕制同冠卷有紐以貫笄其設紐之處但言

廣袤以冠其制已明必兼言縱者蓋注云袤之言乎前後  
圍也冠內之縱以髻爲圍設紐之處雖當武之中不當縱  
之中卽不當髻之中矣故袤必以冠縱之中爲中也廣以  
言乎上下也縱以韜髮其上下當與髻齊紐在武上必當  
縱上下之中乃當髻上下之中故廣亦以縱言之惠氏禮  
說據一本云今時冠卷當簪者廣袤似冠縱其遺象歟謂  
以字當作似字幘之制旁有耳上有屋下有帟帽亦如之  
垂帟覆帽蓋韜髮之遺象故曰廣袤似冠縱其遺象與漢  
之幘梁似古之冠縱今攷鄭此注本以釋五冕之紐上云  
紐小鼻在武上笄所貫也下因釋紐在武上當以冠縱之  
中爲中故舉漢時冠紐釋冕弁之紐也紐在卷上故舉卷

當簪之處釋紐當簪之處也注云冠卷當簪者卽爲紐耳  
漢時冠卷或以鐵爲之或以漆紗爲之其狀如圈惠氏謂  
冠卷當簪之處如幘之有帙幘似冠纒則冠卷當簪之處  
亦似冠纒不知漢時幘下有帙冠卷之下無帙注何得云  
冠卷當簪之處同於幘之有帙且同於幘之似纒乎况鄭  
此注專釋經文紐字耳與幘之似纒何涉如惠氏說則此  
注乃釋幘制非釋紐制也與上注紐小鼻在武上笄所貫  
也數句全不相接矣賈疏釋注亦作廣袤以冠縫云古之  
紐武笄貫之處若今漢時冠卷當簪所貫者於上下之廣  
及隨縫之袤以冠縫者貫笄之處當冠縫之中央據此則  
注內以字不誤惠氏所見周禮縱有善本而賈疏所據則